



KOVERTE

(Ili - ne možete vi toliko tražiti koliko mi možemo obećati...)

Kao što svi vidimo situacija, politička, a onda i poslovna u našoj nam *Dragoj*, svaki dan se sve više i više urušava, dok se *Situacija* u bližem i daljem okruženju nastavlja komplicirati. Grčka bi, recimo, i dalje da troši, po običaju tuđe novce, Španija se pravi da je sve u redu osim sitnice da su im banke propale, a Italijani mole Boga da neko ne vikne da je car go, tj. da je Italija u bankrotu, što je manji problem, i da je po svim aspektima dugoročno nekonkurentna, stara i razmažena, što je malo veći i bojim se, dugoročniji problem...

Za to vrijeme se ovi naši rastaljuju i baš onako "patriotski" po čemu su poznati i "brzo" kao što su nam obećali, pa skoro dvije godine poslije izbora rekonstruiraju vlast, a sve naravno za "čovjeka" kao što su se deklarirali ili deklarirali... E, ono što mene interesira i već dobrano nervira je taj "čovjek" iz onog predizbornog slogana ako ga se još neko sjeća, a koji bi se na latinskom morao zvati, ako se već ne zove - *Homo Levaticus*. Ovo drugo je izvedeno od pasiva bosanskog glagola *levatiti* tj. *biti levaćen*, ako kome nije jasno...

Dok pišem ovaj uvodnik, protestuju radnici *Rudara* iz Konjica pred *Vladom HNK*, kao i radnici *Konjuha* iz Zivnica pred *Federalnom*, još uvijek nerekonstruiranom vladom. Ovi prvi jer je propala privatizacija ima jedno 4-5 godina i nisu primili jedno dvadesetak plaća pa su se baš sad sjetili da onako *Drugarski* i (pred)revolucionarno traže da im se odmah isplati njihovo. Ovi drugi protestuju, jer nije pokrenuta proizvodnja niti je ispunjeno ni O od obećanja koja su zajedno namaštali sa drugim po veličini *Drugom* iz Konjica.

A da slijedi još sličnih stvari u federalnom dijelu naše nam *Drage*, nemojte sumnjati. Jer, revolucionari su namirisali šansu, a i prepoznali su *Drugove* na vlasti i njihovo zlatno pravilo još od *Najvećeg sina* koje glasi - *ne možete vi toliko tražiti koliko mi možemo obećati, a Boga mi i slagati*... Pogotovo pred izbore i dok još mislimo da imamo koverte u rukavu. Koje koverte, pitate se?

Pa one iz stare priče koja kaže da svako ko dođe na vlast od prethodnika dobije tri koverte da ih redom otvori kad zapadne u teškoće.

U prvoj piše - okriviti prethodnike.

U drugoj piše - okriviti saradnike, a i suradnike - čisto onako bratstveno-jedinstveno....

U trećoj - spremite nove tri koverte...

Dokle su ovi dogurali, ocijenite sami.. **B**

Aida Delić,
glavna i odgovorna urednica